

一貫道原典系列

三三歸一 ②

不虛先生講
歸一子整理

(續上期)

源問：天地無為，終古清寧，生之可也。若人在先天，一靈真性，清靜無為，何等自在。而必使之生於五濁惡世，沉淪苦海，殊覺多事。且人生而苦，天地亦因人之生而為人苦，何也。運二氣以生萬物而養人者，天地之苦也。鑒察善惡，以施禍福，而絲毫不漏者，亦天地之苦也。使人不生，則人不受苦，天地亦可以無事，豈不妙哉？

答曰：人與天地為三才，若有天地而無人，則三才不全，何以成為世界，且生天地正為生人也。若不生人，又何用生天地哉。況天地陰陽之氣，流行布濩，得其氣者即有其生，此必然之理也。故道母以無極一元之真，運於天地二五之精，妙合而凝，而生人於天地之間，象天之陽者，則乾道成男，象地之陰者，則坤道成女。乾用九，坤用六，故道母運氣分性，生於寅會之男女，謂之九六原人，九六原人者，言原來之人，共九十六億也，此人之生所由來也。

源問：人既生矣，則當任生任死於天地之間，至戌亥而與天地復歸於無極可也，何以天地未終，而人又開普度乎？

答曰：人之初生也，以天地為爐，以造化為工，以五行為陶鑄，元氣密結，而人生焉，其氣之充周洋溢，而人鍾之不盡者，萬物亦得之而生，是人與物並生也。古初之時，人情渾噩，與物並育而不相害，故人死還為人，物死復為物，至後人心機巧漸生，乃於物之馴柔者，搏而食之，而擥惡之物，則不為人所搏，而反以噬人，人物於是乎相害。但天地之性人為貴，後聖有作，凡人之飲食衣服、宮室器用，無一不備，而於物則或畜牧於家而殺之，或漁獵於野而殺之，

故人能害物，而物不能害人矣。夫人貪生，物亦貪生，人畏死，物亦畏死，豈肯任人之殺而食之，而不思報乎！且天地萬物父母，又豈能任人之殺物，而不使物有以報之乎，此所以六道輪迴，而人畜轉變也。夫人變為畜，則墮落難堪矣。且爭殺相尋，罪孽滔天，而更釀成大劫矣，以原人而墮入畜中，又墮入劫中，則萬劫沉淪，何由返本還原，故逢大劫，必開普度也。

源問：聞之五百年一大劫，豈五百年一開普度乎？

答曰：五百年之劫，較之尋常小劫，則為大，而較之開普度之劫，則猶為小也。此所謂大劫者，在辰會則龍漢劫，在巳會則赤明劫，而在今之午會，則延康劫也。

源問：辰巳午三會，皆有大劫，即皆開普度乎？

答曰：然。

源問：既是原人，皆屬先天佛性，宜一唱則醒矣，何用普度之一而再再而三乎？

答曰：原人雖先天佛性，然既生於塵世，則為氣稟所拘，物欲所蔽，習俗所染，歷劫孽冤矇心，度之甚不易也。故辰會僅度有二億，巳會亦僅度有二億，餘九十二億，尚待午會收圓也。諺

曰「三會圓滿」，又曰「三回為定」，暗言原人必三會始能度圓，諸佛必三回乃能定果也。

源問：請問辰會開普度者何人也？

答曰：道教也，掌教者誰，燃燈老君也。謂之道教者，道猶路也，所以示原人以出苦歸家之路也，必燃燈與老子掌教者，燃燈喻先天元神、性光也。老子喻先天老陽，命寶也。故道教所傳，乃修心煉性，性命雙修之功也，此一期之普度也。

源問：巳會開普度者，何人也？

答曰：佛教也，掌教者誰，釋迦彌陀也。謂之佛教者，佛者覺也，所以覺悟眾生，使之出苦還原也。必釋迦與彌陀掌教者，釋迦明釋去萬緣，撥陰取陽也。彌陀明一性彌綸，圓光陀陀也。故佛教所傳，皆明心見性，性命雙修之旨也，此二期之普度也。

源問：老子、釋迦與孔子並顯於周，則皆午會中人也，今日老子在辰會，釋迦在巳會，此何說也？

答曰：所謂辰會之老子，巳會之釋迦，乃老子、釋迦之前身也。以辰巳過劫，則無可考矣，故復顯於午會，著留經典，闡明心法，以為三期普度、三教合一之憑證也。（續下期）